

摘藻堂四庫全書薈要

史部

欽定四庫全書薈要卷四千八百二十

史部

北史卷九

唐

李

延

壽

撰

周本紀上第九

周太祖文皇帝姓宇文氏諱泰字黑獺代郡武川人也其先出自炎帝炎帝為黃帝所滅子孫遁居朔野其後有葛烏兔者雄武多算略鮮卑奉以為主遂總十二部落世為大人及其裔孫曰普回因狩得玉璽三紐文曰

皇帝璽普回以為天授已獨異之其俗謂天子曰宇文
故國號宇文並以為氏普回子莫那自陰山南徙始居
遼西是曰獻侯為魏舅甥之國自莫那九世至侯歸豆
為慕容晃所滅其子陵仕燕拜駙馬都尉封玄菟公及
慕容寶敗歸魏拜都牧主賜爵安定侯天興初魏遷豪
傑於代都陵隨例徙居武川即為其郡縣人焉陵生系
系生韜韜生皇考肱並以武略稱肱任俠有氣幹正光
末沃野鎮人破六韓拔陵作亂其偽署王衛可環最盛

肱乃糾合鄉里斬壞其衆乃散後陷鮮于修禮為定州
軍所破戰沒於陣武成初追諡曰德皇帝帝德皇帝之
少子也母曰王氏初孕五月夜夢抱子升天纔不至而
止寤以告德皇帝德皇帝喜曰雖不至天貴亦極矣帝
生而有黑氣如蓋下覆其身及長身長八尺方顙廣額
美鬚髯髮長委地垂手過膝背有黑子宛轉若盤龍之
形面色紫光人望而敬畏之少有大度不事家人生業
輕財好施以交結賢士大夫為務隨德皇帝在鮮于修

禮軍及葛榮殺修禮帝時年十八榮下任將帥察其無成謀與諸兄去之計未行會榮滅因隨尔朱榮遷晉陽榮忌帝兄弟雄傑遂託以他罪誅帝第三兄洛生帝以家冤自理辭旨慷慨榮感而免之益加敬待始以統軍從榮征討後以別將從賀拔岳討北海王顥於洛陽孝莊反正以功封寧都子後從岳入關平万俟醜奴行原州事時關隴寇亂帝撫以恩信百姓皆喜曰早遇宇文使君吾等豈從逆亂帝嘗從數騎於野忽聞簫鼓之音

以問從者皆莫之聞意獨異之普泰二年尔朱天光東
拒齊神武留弟顯壽鎮長安召秦州刺史侯莫陳悅東
下岳知天光必敗欲留悅共圖顯壽計無所出帝謂岳
曰今天光尚近悅未必貳心若以此事告之恐其驚懼
然悅雖為主將不能制物若先說其衆必人有留心進
失爾朱之期退恐人情變動若乘此說悅事無不遂岳
大喜卽令帝入悅軍說之悅遂與岳襲長安帝輕騎為
前鋒追至華陰禽顯壽及岳為關西大行臺以帝為左

丞領岳府司馬事無巨細皆委決焉齊神武旣除尔朱氏遂專朝政帝請往觀之至并州神武以帝非常人曰此小兒眼目異將留之帝詭陳忠款具託左右苦求復命倍道而行行一日而神武乃悔發上驛千里追帝至關不及而反帝還謂岳曰高歡豈人臣邪逆謀未發者憚公兄弟耳侯莫陳悅本實庸材亦不為歡忌但為之備圖之不難今費也頭控弦之騎不下一萬夏州刺史解拔彌俄突勝兵三千餘人及靈州刺史曹泥並恃僻

遠常懷異望河西流人紇豆陵伊利等戶口富實未奉
朝風今若移軍近隴扼其要害示之以威懷之以德卽
可收其士馬以資吾軍西輯氐羌北撫沙塞還軍長安
匡輔魏室此桓文之舉也岳大悅復遣帝詣闕請事密
陳其狀魏帝納之加帝武衛將軍還令報岳岳遂引軍
西次平涼岳以夏州隣接寇賊欲求良刺史以鎮之衆
皆舉帝岳曰宇文左丞吾左右手何可廢也沉吟累日
乃從衆議表帝為夏州刺史帝至州伊利望風款附而

曹泥猶通使於齊神武魏永熙三年正月賀拔岳欲討曹泥遣都督趙貴至夏州與帝謀帝曰曹泥孤城阻遠未足為憂侯莫陳悅貪而無信是宜先圖也岳不聽遂與悅俱討泥二月至河曲果為悅所害衆散還平涼唯大都督趙貴率部曲收岳屍還營三軍未知所屬諸將以都督寇洛年最長推總兵事洛素無雄略威令不行乃請避位於是趙貴言於衆稱帝英姿雄略若告喪必來赴難因而奉之大事濟矣諸將皆稱善乃令赫連達

馳至夏州告帝士吏咸泣請留以觀其變帝曰難得而易失者時也不俟終日者機也今不早赴將恐衆心自離都督彌姐元進規應悅密圖帝事發斬之帝乃率帳下輕騎馳赴平涼時齊神武遣長史侯景招引岳衆帝至定安遇之於傳舍吐哺上馬謂曰賀拔公雖死宇文泰尚存卿何為也景失色曰我猶箭耳隨人所射者也景於此還帝至平涼哭岳甚慟將士悲且喜曰宇文公至無所憂矣齊神武又使景與常侍張華原義寧太守

王基勞帝帝不受命與基有舊將留之并欲留景並不
屈乃遣之時斛斯椿在帝所曰景人傑也何故放之帝
亦悔驛追之不及基亦逃歸言帝雄傑請及其未定滅
之神武曰卿不見賀拔侯莫陳乎吾當以計拱手取之
及沙苑之敗神武乃始追悔于時魏帝將圖神武聞岳
被害遣武衛將軍元毗宣旨勞岳軍追還洛陽毗到平
涼會諸將已推帝侯莫陳悅亦被勅追還悅既附神武
不肯應召帝曰悅枉害忠良復不應詔命此國之大賊

乃令諸軍戒嚴將討悅及毗還帝表於魏帝辭以高歡
至河東侯莫陳悅在永洛首尾受敵乞少停緩帝志在
討悅而未測朝旨且衆未集假為此辭因與元毗及諸
將刑牲盟誓同獎王室初賀拔岳營河曲軍吏獨行忽
見一翁謂曰賀拔雖據此衆終無所成當有一字文家
從東北來後必大盛言訖不見至是方驗魏帝因詔帝
為大都督即統賀拔岳軍帝乃與悅書責以殺賀拔岳
罪又諭令歸朝悅乃詐為詔書與秦州刺史万俟普撥

令為已援晉撥疑之封以呈帝帝表奏之魏帝因問帝
安秦隴計帝請召悅授以內官及處以瓜涼一藩不然
則終致猜虞三月帝進軍至原州衆軍悉集諭以討悅
意士卒莫不懷憤四月引兵上隴留兄子遵為都督鎮
原州帝軍令嚴肅秋毫無犯百姓大悅軍出木狹關大
雪平地二尺帝知悅怯而多猜乃倍道兼行出其不意
悅果疑其左右有異志左右不自安衆遂離貳聞大軍
且至退保略陽留一萬餘人據守永洛帝至圍之城降

帝卽輕騎數百趣略陽以臨悅軍其部將皆勸悅退保上邽時南秦州刺史李弼亦在悅軍間遣使請為內應其夜悅出軍軍自驚潰將卒或來降帝縱兵奮擊大破之悅與其子弟及麾下數十騎遁走帝乃命原州都督遵追悅至牽屯山斬之傳首洛陽帝至上邽悅府庫財物山積皆以賞士卒毫釐無所取左右竊以一銀甕歸帝知而罪之卽剖賜將士衆大悅齊神武聞關隴剋捷遣使於帝深相倚結帝拒而不納封神武書以聞時神

武已有異志故魏帝深仗於帝仍令帝稍引軍而東帝乃令大都督梁禦率步騎五千將鎮河渭合口為圖河東計魏帝進帝侍中驃騎大將軍開府儀同三司關西大都督略陽縣公承制封拜使持節如故時魏帝方圖齊神武又遣徵兵帝乃令前秦州刺史駱超為大都督率輕騎一千赴洛魏帝進授帝兼尚書左僕射關西大行臺餘官如故帝乃傳檄方鎮曰蓋聞陰陽遞用盛衰相襲苟當百六無間三五皇家創歷陶鑄蒼生保安四

海仁育萬物運距孝昌屯沴屢起隴冀騷動燕河狼顧
雖靈命重啓蕩定有期而乘釁之徒因翼生羽賊臣高
歡器識庸下出自輿阜罕聞禮義直以一介鷹犬効力
戎行覲冒恩私遂階榮寵不能竭誠盡節專挾姦回乃
勸尔朱榮行茲篡逆及榮以專政伏誅世隆以凶黨外
叛歡苦相敦勉令取京師又勸吐万兒復為弑虐暫立
建明以令天下假推普泰欲竊威權並歸廢斥俱見酷
害於是稱兵河北假討尔朱亟通表奏云取讒賊既行

廢黜遂將篡弑以人望未改恐鼎鑊交及乃求宗室權
允人心天方與魏必將有主翊戴聖明誠非歡力而歡
阻兵安忍自以為功廣布腹心跨州連郡端揆禁闥莫
非親黨皆行貪虐竄竄生靈而舊將名臣正人直士橫
生瘡痍動挂網羅故武衛將軍伊琳清直武毅禁旅攸
屬直閣將軍鮮于康仁忠亮驍傑爪牙斯在歡收而戮
之曾無聞奏司空高乾是其黨與每相影響謀危社稷
但姦志未從恐先泄漏乃密白朝廷使殺高乾方哭對

其弟稱天子橫戮孫騰任祥歡之心脅並使入居樞近
伺國閒隙知歡逆謀將發相繼歸逃歡益加撫待亦無
陳白然歡入洛之始本有姦謀令親人蔡儁作牧河濟
厚相思贍為東道主人故關西大都督清水公賀拔岳
勲德隆重興亡攸寄歡好亂樂禍深相忌毒乃與侯莫
陳悅陰圖陷害幕府以受律專征便即討戮歡知逆狀
已露稍懷旅拒遂遣蔡儁拒代令竇泰佐之又遣侯景
等云向白馬輔世珍等徑趣石濟高隆之及婁昭等屯

據壺關韓軌之徒擁衆蒲坂於是上書天子數論得失
訾毀乘輿威侮朝廷藉此微庸冀茲大寶溪壑可盈禍
心不測或言徑赴荆楚開疆於外或言分詣伊洛取彼
讒人或言欲來入關與幕府決戰今聖明御運天下清
夷百寮師師四隩來暨人盡忠良誰為君側而歡威福
自己生是亂階緝構南箕指鹿為馬包藏凶逆伺我神
器是而可忍孰不可容幕府折衝宇宙親當受脤銳師
百萬設騎千羣裹糧坐甲唯敵是俟義之所在縻軀匪

恠頻有詔書班告天下稱歡逆亂徵兵致伐今便分命
將帥應機進討或趣其要害或襲其窟穴電繞地擊霧
合星羅而歡違負天地毒被人鬼乘此掃蕩易同俯拾
歡若度河稍逼宮廟則分命諸將直取并州幕府躬自
東轅電赴伊洛若固其巢穴未敢發動亦命羣帥百道
俱前轅裂賊臣以謝天下其州鎮郡縣率土黎人或州
鄉冠冕或勲庸世濟並宜捨逆歸順立効軍門封賞之
科已有別格凡百君子可不勉哉帝謂諸軍曰高歡雖

智不足而詐有餘今聲言欲西其意在入洛吾欲令寇
洛率馬步萬餘自涇州東引王羆率甲士一萬先據華
州歡若西來王羆足得抗拒如其入洛寇洛卽襲汾晉
吾便速駕直赴京邑使其進有內顧之憂退有被躡之
勢一舉大定此為上策衆咸稱善七月帝帥衆發自高
平前軍至于弘農而齊神武稍逼京師魏帝親總六軍
屯河橋令左衛元斌之領軍斛斯椿鎮武牢帝謂左右
曰高歡數日行八九百里曉兵者所忌正須乘便擊之

而主上以萬乘之重不能度河決戰方緣津據守且長
河萬里扞禦為難一處得度大事去矣卽以大都督趙
貴為別道行臺自蒲坂濟趣并州遣大都督李賢將精
騎一千赴洛陽會斌之與斛斯椿爭權鎮防不守魏帝
遂輕騎入關帝備儀衛奉迎謁見於東驛免冠流涕謝
罪乃奉魏帝都長安披草萊立朝廷軍國之政咸取決
於帝仍加授大將軍雍州刺史兼尚書令進封略陽郡
公別置二尚書隨機處分解尚書僕射餘如故初魏帝

在洛陽許以馮翊長公主配帝未及結納而魏帝西遷至是詔帝尚之拜駙馬都尉八月齊神武襲陷潼關侵華陰帝率諸軍屯霸上以待之神武留其將薛瑾守關而退帝乃進軍斬瑾虜其卒七千還長安進位丞相十一月遣儀同李諱與李弼趙貴等討曹泥於靈州諱引河灌之明年泥降遷其豪帥於咸陽十二月魏孝武帝崩帝與羣公定冊尊立魏南陽王寶炬為嗣是為文帝大統元年正月己酉魏帝進帝都督中外諸軍錄尚書

事大行臺改封安定郡王帝固讓王及錄尚書魏帝許之乃改封安定郡公東魏將司馬子如寇潼關帝軍霸上子如乃回軍自蒲津寇華州刺史王羆擊走之三月帝命有司為二十四條新制奏行之

二年五月秦州刺史建忠王万俟普撥率所部入東魏帝輕騎追之至河北千餘里不及而還

三年正月東魏寇龍門屯軍蒲坂造三道浮橋度河又遣其將竇泰趣潼關高昂圍洛州帝出軍廣陽召諸將

謂曰賊倚吾三面又造橋示欲必度是欲綴吾軍使竇泰得西入耳且歡起兵以來泰每先驅下多銳卒屢勝而驕今襲之必剋剋泰則歡不戰而走矣諸將咸曰賊在近捨而襲遠若差跌悔何及也帝曰歡前再襲潼關吾軍不過霸上今者大來謂吾但自守耳又扭於得志有輕我之心乘此擊之何往不剋賊雖造橋未能徑度比五日中吾取泰必矣庚戌帝還長安聲言欲向隴右辛亥謁魏帝而潛軍至小關竇泰卒聞軍至陳未成帝

擊之盡俘其衆斬泰傳首長安高昂聞之焚輜重而走
齊神武亦撤橋而退帝乃還六月帝請罷行臺魏帝復
申前命授帝錄尚書事固讓乃止八月丁丑帝率李弼
獨孤信梁禦趙貴于謹若干惠怡峯劉亮王德侯莫陳
崇李遠達奚武等十二將東伐至潼關帝乃誓於師曰
與爾有衆奉天威誅暴亂惟爾衆士整爾甲兵戒爾戎
事無貪財以輕敵無暴人以作威用命則有賞不用命
則有戮爾衆士其勉之乃遣于謹先徇地至盤豆拔之

獲東魏將高叔禮送于長安戊子至弘農攻之城潰禽
東魏陝州刺史李徽伯虜具戰士八千守將高千走度
河命賀拔勝追禽之並送長安於是宜陽邵郡皆歸附
先是河南豪傑應東魏者皆降齊神武懼率衆下蒲坂
將自后土濟遣其將高昂以三萬人出河南是歲關中
饑帝館穀於弘農五十餘日時軍士不滿萬人聞神武
將度乃還神武遂度河逼華州刺史王羆嚴守乃涉洛
軍於許原西帝至渭南徵諸州兵未會將擊之諸將以

衆寡不敵請且待歡更西以觀之帝曰歡若至咸陽人情轉騷擾今及其新至可擊之即造浮橋於渭令軍士齎三日糧輕騎度渭輜重自渭南夾渭而西十月壬辰至沙苑距齊軍六十餘里神武引軍來會癸巳候騎告齊軍至帝召諸將謀李弼曰彼衆我寡不可平地置陣此東十里有渭曲可先據以待之遂進至渭背水東西為陣李弼為右拒趙貴為左拒命將士皆偃戈於葭蘆中聞鼓聲而起日晡齊師至望見軍少競萃於左軍亂

不成列兵將交帝鳴鼓士皆奮起于謹等六軍與之合戰李弼等率鐵騎橫擊之絕其軍為二遂大破之斬六千餘級臨陣降者二萬餘人神武夜遁追至河上復大剋前後虜其卒七萬留其甲兵二萬餘悉縱歸收其輜重兵甲獻俘長安李穆曰高歡膽破矣逐之可獲帝不聽乃還軍渭南時所徵諸州兵始至乃於戰所準當時兵人種樹一株栽柳七千根以旌武功魏帝進帝柱國大將軍增邑并前五千戶李弼等十二將亦進爵增邑

以左僕射馮翊王元季海為行臺與開府獨孤信帥步
騎二萬向洛陽賀拔勝李弼度河圍蒲坂蒲坂鎮將高
子信開門納勝軍東魏將薛崇禮棄城走勝等追獲之
帝進軍蒲坂略定汾絳初帝自弘農入關後東魏將高
昂圍弘農聞其軍敗退守洛陽獨孤信至新安昂復走
度河遂入洛陽自梁陳已西將吏降者相屬於是東魏
將堯雄趙育是云寶出潁川欲復降地帝遣儀同宇文
貴梁遷等逆擊大破之趙育來降東魏復遣任祥率河

南兵與堯雄合儀同怡峯與貴遷等復擊破之又遣都督韋孝寬取豫州是云寶殺其東揚州刺史那椿以州來降

四年三月帝率諸將入朝禮畢還華州七月東魏將侯景等圍獨孤信於洛陽齊神武繼之帝奉魏帝至穀城臨陣斬東魏將莫多婁貸文悉虜其衆送弘農遂進軍瀍東景等夜解圍去及旦帝率輕騎追至河上景等北據河橋南屬芒山為陣與諸軍戰帝馬中流矢驚逸軍

中擾亂都督李穆下馬授帝軍復振於是大捷斬其將
高昂李猛宋顯等虜其甲士一萬五千人赴河死者萬
數是日置陣既大首尾懸遠從旦至未戰數十合氛霧
四塞莫能相知獨孤信李遠居右趙貴怡峯居左戰並
不利又未知魏帝及帝所在皆棄其卒先歸開府李諱
念賢等為後軍遇信等退即與俱還由是班師洛陽亦
失守大軍至弘農守將皆已棄城西走所虜降卒在弘
農者因相與閉門拒守進攻拔之誅其魁首數百人大

軍之東伐也關中留守兵少而前後所虜東魏士卒皆散在百姓間乃謀亂及李諱等至長安計無所出乃與太尉王明僕射周惠達輔魏太子出次渭北關中大震恐百姓相剽劫於是沙苑所俘軍人趙青雀雍州人于伏德等遂反青雀據長安子城伏德保咸陽與太守慕容思慶各收降卒以拒還師長安城人皆相率拒青雀每日接戰魏帝留止閼鄉令帝討之長安父老見帝且悲且喜曰不意今日復得見公士女咸相賀華州刺史

宇文導襲咸陽斬思慶禽伏德南度渭與帝會攻破青
雀太傅梁景叡先以疾留長安遂與青雀通謀至是亦
伏誅關中乃定魏帝還長安帝復屯華州十二月是云
寶襲洛陽東魏將王元軌棄城走都督趙剛襲廣州拔
之自襄廣以西城鎮復西屬

五年冬大閱於華陰

六年春東魏將侯景出三鵠將侵荊州帝遣開府李弼
獨孤信各率騎出武關景乃還夏蠕蠕度河至夏州帝

召諸軍屯沙苑以備之

七年十一月帝奏行十二條制恐百官不勉於職事又下令申明之

八年十月齊神武侵汾絳圍玉壁帝出軍蒲坂神武退度汾追之遂遁去十二月魏帝狩於華陰大饗將士帝帥諸將朝於行在所

九年二月東魏北豫州刺史高慎舉州來附帝帥師迎之三月齊神武據芒山陣不進者數日帝留輜重於瀍

曲軍士銜枚夜登芒山未明擊之神武單騎為賀拔勝
所逐僅免帝率右軍若干惠大破神武軍悉虜其步卒
趙貴等五將軍居右戰不利神武復合戰帝又不利夜
引還入關屯渭上神武進至陝開府達奚武等禦之乃
退帝以芒山諸將失律上表自貶魏帝不許於是廣募
關隴豪右以增軍旅十月大閱於櫟陽還屯華州

十年五月帝朝京師七月魏帝以帝前後所上二十四
條及十二條新制定為中興永式命尚書蘇綽更損益

之總為五卷班於天下於是搜簡賢才為牧守令習新制而遣焉數年間百姓使之十月大閱於白水

十一年十月大閱于白水遂西狩岐陽

十二年春涼州刺史宇文仲和據州反瓜州人張保害刺史成慶以應之帝遣開府獨孤信討之東魏將侯景侵襄州帝遣開府若干惠禦之至穰景遁去五月獨孤信平涼州禽仲和遷其百姓六千餘家於長安瓜州都督令狐延起義誅張保瓜州平七月帝大會諸軍於咸

陽

十三年正月東魏河南大行臺侯景舉河南六州來附
被圍於潁川六月帝遣開府李弼援之東魏將韓軌等
遁去景遂徙鎮豫州於是遣開府王思政據潁川弼引
軍還七月侯景密圖附梁帝知其謀悉追還前後所配
景將士景懼遂叛冬帝奉魏帝西狩咸陽

十四年春魏帝詔封帝長子覺為寧都郡公初帝以平
元顥納孝莊帝功封寧都縣子至是改以為郡以封覺

用彰勤王之始也五月魏帝進帝位太師帝奉魏太子巡撫西境登隴刻石紀事遂至原州歷北長城大狩東趣五原至蒲州聞魏帝不豫而還及至魏帝疾已愈乃還華州是歲東魏將高岳圍王思政於潁川

十五年春帝遣大將軍趙貴帥師援王思政高岳堰洧水以灌城潁川以北皆為陂澤救兵不得至六月潁川陷初侯景圍建業梁司州刺史柳仲禮赴臺城梁竟陵郡守孫暉以郡內附帝使大都督符貴鎮之及建業陷

仲禮還司州來寇嵩以郡叛帝大怒十一月遣開府楊忠攻剋隨州進圍仲禮長史馬岫於安陸

十六年正月仲禮來援安陸楊忠逆擊於滹頭大破之禽仲禮馬岫以城降三月魏帝封帝第二子震為武邑公七月帝東伐拜章武公導為大將軍總督留守諸軍屯涇北鎮關中九月丁巳軍出長安連雨自秋及冬諸軍馬驢多死遂於弘農北造橋濟河自蒲坂還於是河南自洛陽河北自平陽以東遂入齊

十七年三月魏文帝崩皇太子嗣位帝以冢宰總百揆
十月帝遣大將軍王雄出子午伐上津魏興大將軍達
奚武出散關伐南鄭

廢帝元年春王雄平上津魏興以其地置東梁州四月
達奚武圍南鄭月餘梁州刺史宜豐侯蕭循以州降武
八月東梁州百姓圍州城帝復遣王雄討之

二年正月魏帝詔帝為左丞相大行臺都督中外諸軍
事二月東梁州平遷其豪帥於雍州三月帝遣大將軍

魏安公尉遲迴帥師伐梁武陵王蕭紀於蜀四月帝勒
銳騎三萬西踰隴度金城河至姑臧吐谷渾震懼遣使
獻其方物七月帝至自姑臧八月尉遲迴剋成都劔南
平十一月尚書元烈謀亂伏誅

三年正月始作九命之典以叙内外官爵以第一品為
九命第九品為一命改流外品為九秩亦以九為上又
改置州郡縣凡改州四十六置州一改郡一百六改縣
三百三十魏帝有怨言於是帝與公卿議廢帝立齊王

廓是為恭帝

恭帝元年四月帝大饗羣臣魏史柳虬執簡書告于朝
曰廢帝文皇帝之嗣子年七歲文皇帝託於安定公曰
是子也才由于公不才亦由于公公宜勉之公既受茲
重寄居元輔之任又納女為皇后遂不能訓誨有成致
令廢黜負文皇帝付屬之意此咎非安定公而誰帝乃
令太常盧辯作誥諭公卿曰嗚呼我羣后暨衆士維文
皇帝以襁褓之嗣託於予訓之誨之庶厥有成而予罔

能革變厥心庸暨乎廢墜我文皇帝之志嗚呼茲咎予
其焉避予實知之矧爾衆人之心哉惟予之顏豈惟今
厚將恐來世以予為口實乙亥魏帝詔封帝子邕為輔
城公憲為安城公七月西狩至原州梁元帝遣使請據
舊圖以定疆界又連結於齊言辭悖慢帝曰古人有言
天之所棄誰能興之其蕭繹之謂乎十月壬戌遣柱國
于謹中山公護與大將軍楊忠韋孝寬等步騎五萬討
之十一月癸未師濟漢中山公護與楊忠率銳騎先屯

其城下丙申于謹至江陵列營圍守辛亥剋其城戕梁
元帝虜其百官士庶以歸沒為奴婢者十餘萬免者二
百餘家立蕭譽為梁主居江陵為魏附庸魏氏之初統
國三十六大姓九十九後多絕滅至是以諸將功高者
為三十六國後次者為九十九姓後所統軍人亦改從
其姓

二年梁廣州刺史王琳寇邊十月帝遣大將軍豆盧寧
帥師討之

三年正月丁丑初行周禮建六官魏帝進帝位太師大冢宰帝以漢魏官繁思革前弊大統中乃令蘇綽盧辯依周制改創其事尋亦置六卿官然為撰次未成衆務猶歸臺閣至是始畢乃命行之四月帝北巡七月度北河魏帝封帝子直為秦郡公招為正平公九月帝不豫還至雲陽命中山公護受遺輔嗣子十月乙亥帝薨于雲陽宮還長安發喪時年五十二月甲申葬于成陵諡文公及孝閔帝受禪追尊為文王廟曰太祖武成元

年追尊為文皇帝帝知人善任使從諫如順流崇尚儒術明達政事恩信被物能駕馭英豪一見之者咸思用命沙苑所護囚俘釋而用之及河橋之役以克戰士皆得其死力諸將出征授以方略無不制勝性好朴素不尚虛飾恒以反風俗復古始為心云

孝閔皇帝諱覺字陀羅尼文帝第三子也母曰元皇后大統八年生於同州七歲封略陽郡公時善相者史元華見帝退謂所親曰此公子有至貴相但恨不壽耳魏

恭帝三年三月命為安定公世子四月拜大將軍十月
乙亥文帝崩景子世子嗣位為太師大冢宰十二月丁
亥魏帝詔以岐陽地封帝為周公庚子詔禪位于帝曰
予聞皇天之命不于常惟歸于德故堯授舜舜授禹時
宜也天厭我魏邦垂變以告惟爾罔弗知予雖不明敢
弗龔天命格有德哉今踵唐虞舊典禪位于周庸布告
爾焉使大宗伯趙貴持節奉冊書曰咨爾周公帝王之
位弗常有德者受命時乃天道予式時庸荒求于唐虞

之彝踵曰我魏德之終舊矣我邦小大罔弗知今其可
允怫于天道而不歸有德歟時用詢謀僉曰公昭考文
公格勲德于天地丕濟黔黎洎公又躬宣重光故玄象
徵見于上謳訟奔走于下天之歷數用實在焉予安敢
弗若是以欽祗聖典遜位于公公其享茲天命保有萬
國可不慎歟魏帝臨朝遣戶部中大夫濟北公元迪致
皇帝璽綬帝固辭公卿百辟勸進太史陳祥瑞乃從之
是日魏帝遜位于大司馬府

元年春正月天王卽位柴燎告天朝百官于路門追尊
皇考文公為文王皇妣為文后大赦封魏帝為宋公是
日槐里獻赤雀百官奏議曰帝王之興罔弗更正朔明
受之於天革人視聽也逮于尼甫稽諸陰陽云行夏之
時後王所不易今魏歷告終周室受命以木承水實當
行錄正用夏時式遵聖道惟文王誕玄氣之祥有黑水
之讖服色宜尚焉制曰可以大司徒趙郡王李弼為太
師以大宗伯南陽公趙貴為太傅大冢宰以大司馬河

內公獨孤信為太保以大宗伯中山公護為大司馬以大將軍寧都公毓高陽公達奚武武陽公豆盧寧小司寇陽平公李遠小司馬博陵公賀蘭祥小宗伯魏安公尉遲迥並為柱國壬寅祀圓丘詔曰予本自神農其於二丘宜作厥主始祖獻侯啓于遼海配南北郊文考德符五運受天明命祖于明堂以配上帝癸卯祀方澤甲辰遂祭太社初除市門稅乙巳享太廟丁未會于乾安殿班賞各有差戊申詔有司分命使者巡察風俗求人

得失禮餼高年恤于鰥寡辛亥祀南郊壬子立王后元
氏辛酉享太廟癸亥親耕籍田二月癸酉朔朝日于東
郊戊寅祭太社丁亥柱國楚國公趙貴謀反伏誅太保
獨孤信罪免甲午以大司空梁國公侯莫陳崇為太保
大司馬晉國公護為大冢宰柱國博陵公賀蘭祥為大
司馬高陽公達奚武為大司寇大將軍化政公宇文貴
為柱國三月己酉衛國公獨孤信賜死癸亥省六府士
員三分之一夏四月壬申降死罪已下囚壬午謁成陵

丁亥享太廟五月己酉帝將觀漁於昆明池博士姜頊
諫乃止秋七月壬寅帝聽訟於右寢多所哀宥辛亥享
太廟八月戊辰祭太社辛未降死罪已下囚甲午詔二
十四軍舉賢良九月庚申改太守為郡守帝性剛果忌
晉公護之專司會李植軍司馬孫恒以先朝佐命入侍
左右亦疾護權重乃與宮伯乙鳳賀拔提等潛請帝誅
護帝許之又引宮伯張先洛先洛以白護護乃出植為
梁州刺史恒為潼州刺史鳳等更奏帝將召羣臣入因

此誅護先洛又白之時小司馬尉綱總統宿衛兵護乃
召綱入殿中詐呼鳳等論事以次執送護第並誅之綱
仍罷禁兵帝無左右獨在內殿以宮人執兵自守護遣
大司馬賀蘭祥逼帝遜位貶為略陽公遂幽於舊邸月
餘日以弑崩時年十六植恒等亦遇害及武帝誅護後
乃詔曰故略陽公至德純粹天姿秀傑屬魏祚告終寶
命將改謳歌允集歷數攸歸上協蒼靈之慶下昭后祇
之錫而禍生肘腋釁起蕭牆白武噬驂蒼鷹集殿幽辱

神器弑酷乘輿寃結生靈毒流寓縣今河海澄清氛沴
消蕩追尊之禮宜崇徽號遣太師蜀國公迴於南郊上
諡曰孝閔皇帝陵曰靜陵

世宗明皇帝諱毓小名統萬突文皇帝之長子也母曰
姚夫人永熙三年文帝臨夏州生於統萬城因以名焉
大統十四年封寧都郡公魏恭帝三年累遷大將軍鎮
隴右孝閔踐阼進位柱國轉岐州刺史有美政及孝閔
廢晉公護遣迎帝於岐州九月癸亥至京師止於舊邸

羣臣上表勸進備法駕奉迎帝固讓羣臣固請乃許之
元年秋九月天王即位大赦乙丑朝羣臣於延壽殿冬
十月癸酉太師趙國公李弼薨己卯以大將軍昌平公
尉綱為柱國乙酉祀圓丘景戌祀方丘甲午祭太社陽
平公李遠賜死辛未梁敬帝遜位于陳十一月庚子享
太廟丁未祀圓丘十二月庚午謁成陵庚辰以大將軍
輔城公邕為柱國戊子赦長安見囚甲午詔元氏子女
自坐趙貴等事以來所有没入為官口者悉免之

二年春正月乙未以太冢宰晉公護為太師辛亥親耕
籍田癸丑立王后獨孤氏丁巳於雍州置十二郡三月
甲午北豫州刺史司馬消難舉州來附改雍州刺史為
牧京兆郡守為尹庚申詔三十六國九十九姓自魏南
徙皆稱河南人今周室既都關中宜改稱京兆人夏四
月己巳以太師晉公護為雍州牧辛未降死罪囚一等
五歲刑己下皆原之甲戌天王后獨孤氏崩甲申葬敬
后五月乙未以大司空梁國公侯莫陳崇為大宗伯六

月癸亥嘯達國遣使朝貢己巳板授高年刺史守令恤

鰥寡孤獨各有差分長安為萬年縣並居京城壬申遣
使分行州郡理囚徒察風俗掩骸埋胔秋七月順陽獻
三足鳥八月甲子羣臣上表稱慶於是大赦文武普進
級九月辛卯以大將軍楊忠王雄並為柱國甲辰封少
師元羅為韓國公以紹魏後丁未行幸同州故宅賦詩
冬十月辛酉突厥遣使朝貢癸亥太廟成乙亥以功臣
琅邪貞獻公賀拔勝等十三人配享文帝廟庭壬午大

赦

武成元年春正月己酉太師晉公護上表歸政帝始親
萬機軍旅猶總於護初改都督諸州軍事為總管三月
癸巳陳六軍帝親擐甲胄迎太白於東方吐谷渾寇邊
庚戌遣大司馬博陵公賀蘭祥率衆討之夏五月戊子
詔有司造周歷己亥聽訟於正武殿辛亥以大宗伯梁
國公侯莫陳崇為大司徒大司寇高陽公達奚武為大
宗伯武陽公豆盧寧為大司寇柱國輔城公邕為大司

空乙卯詔曰比屢有糾發官司赦前事者有司自今勿推究唯庫廩倉廩與海內所共漢帝有云朕為天下守財耳若有侵盜公家財畜錢粟者魏朝之事年月既遠一不須問自周有天下以來雖經赦宥事迹可知者有司宜即推窮得實之日免其罪徵備如法賀蘭祥攻拔洮陽洪和二城吐谷渾遁走閏月高昌遣使朝貢六月戊子大雨霖詔公卿大夫士爰及牧守黎庶等令各上封事讜言極諫無有所諱其遭水者有司可時巡檢條

列以聞庚子詔曰潁川從我是曰元勲無忘父城實起
王業文考屬天地草昧造化權輿拯彼流亡匡茲頽運
賴英賢盡力文武同心翼贊大功克隆帝業而被堅執
銳櫛風沐雨永言疇昔良用憮然若功成名遂建國剖
符子唯休也其有致死王事妻子無歸者朕甚傷之凡
從先王向夏州發夏州從來見在及薨亡者並量賜錢
帛稱朕意焉是月陳武帝殂秋八月己亥改天王稱皇
帝追尊文王為文皇帝大赦改元癸丑增御正四人位

上大夫冬十月齊文皇帝殂

二年春正月癸丑朔大會羣臣于紫極殿始用百戲三月辛酉重陽閣成會羣臣公侯列將卿大夫及突厥使於芳林園賜錢帛各有差夏四月帝因食糖粳遇毒庚子大漸詔曰人生天地之間稟五常之氣天地有窮已五常有推移人安得長在是以有生有死者物理之必然處必然之理脩短之間何足多恨朕雖不德性好典墳披覽聖賢餘論未嘗不以此自曉今乃命也夫復何

言諸公及在朝卿大夫士軍中大小督將軍人等並立
勲効積有年載輔翼太祖成我周家令朕繼承大業處
萬乘之上此上不負太祖下不負朕躬朕得啓手啓足
從先帝於地下實無恨于心矣所可恨者朕享大位可
謂四年矣不能使政化修理黎庶豐足九州未一二方
猶梗顧此恨恨目用不瞑唯冀仁兄冢宰洎朕先正先
父公卿大臣等協和為心勉力相勸勿忘太祖遺志提
挈後人朕雖沒九泉形骸不朽今大位虛曠社稷無主

朕兒幼少未堪當國魯國公邕朕之介弟寬仁大度海
內共聞能弘我周家必此子也夫人貴有始終公等事
太祖輔朕躬可謂有始矣若克念政道顧其艱難輔邕
以王天下者可謂有終矣哀死事生人臣大節公等可
思念此言令萬代稱歎朕稟生儉素非能力行菲薄每
寢大布之被服大帛之衣凡是器用皆無彫刻身終之
日豈容違棄此好喪事所須務從儉約歛以時服勿使
有金玉之飾若以禮不可闕皆令用瓦小歛訖七日哭

文武百官各權辟麻苴以素服從事葬日選擇不毛之地因勢為墳勿封勿樹且厚葬傷生聖人所誠既服膺聖人之教安敢違之凡百官司勿異朕意四方州鎮使到各令三日哭哭訖權辟凶服還以素服從事待大例除非有呼召各按部自守不得輒奔赴闕庭禮有通塞隨時之義葬訖內外悉除服從吉三年之內勿禁婚娶一令如平常也時事殷猥病困心亂止能及此如事有不盡準此以類為斷死而可忍古人有之朕今忍死盡

此懷抱其詔卽帝口授也辛丑帝崩於延壽殿時年二十七諡曰明皇帝廟號世宗五月辛未葬於昭陵帝寬明仁厚敦睦九族有君人之量幼而好學博覽羣書善屬文詞彩溫麗及卽位集公卿已下有文學者八十餘人於麟趾殿刊校經史又摭採衆書自義農已來訖于魏末叙為世譜凡百卷所著文章十卷

論曰昔者水運將終羣凶放命或權威震主或釁逆滔天咸謂大寶可以力致神器可以求得而卒誅夷繼及

亡不旋踵是知天命有底庸可惱乎周文爰自潛躍衆
無一旅驅馳戎馬之際躡足行伍之間時屬與能運膺
啓聖鳩集義勇糾合同盟一舉而殄仇讐再駕而匡帝
室於是內詢帷幄外杖材雄推至誠以待人弘大順以
訓物高氏藉甲兵之衆恃戎馬之強屢入近畿志圖吞
噬及英謀電發神旆風馳弘農建城濮之勲沙苑有昆
陽之捷取威定霸以弱為強紹元宗之衰緒創隆周之
景命南清江漢西舉巴蜀北控沙漠東據伊瀍乃擯落

魏晉憲章古昔修六官之廢典成一代之鴻規德刑並
用勲賢兼叙遠安邇悅俗阜人和億兆之望有歸揖讓
之期允集功業若此人臣以終盛矣哉非夫雄略冠時
英姿不世天與神授緯武經文者孰能與於此乎昔漢
獻蒙塵曹公成夾輔之業晉安播蕩宋武建匡合之勲
校德論功綽有餘裕至於渚宮制勝闔城孑戮蠕蠕歸
命盡種誅夷雖事出於權道而用乖於德教斯為過矣
孝閔承既安之業膺樂推之運明皇處代邸之尊纂大

宗之緒始則權臣專命終乃政出私門俱懷芒刺之疑
用致幽弑之禍惜哉

北史卷九

北史卷九考證

周太祖文皇帝紀自莫那九世至侯歸豆○侯歸豆周書作侯豆歸

其偽署王衛可瓌最盛○瓌周書作孤

後陷鮮于修禮○鮮于上脫於字今各本俱同姑仍之
四月引兵上隴留兄子遵為都督鎮原州○遵周書作
導

軍出木狹關○狹一本作峽

世隆以凶黨外叛歡苦相敦勉令取京師○苦監本訛
若今改從閣本

謁見于東驛○東驛周書作東陽驛

帝至渭南徵諸州兵未會將擊之○未周書作皆下文
云乃還軍渭南時所徵諸州兵始至則此處當以未
為正

三月齊神武據芒山陣不進者數日○陣字上周書有
為字

十四年春魏帝詔封帝長子覺為寧都郡公。○覺周書作毓。本卷明帝紀諱毓為文皇帝長子。大統十四年封寧都郡公。應改從之。今各本俱同。姑仍其舊。

四月帝勒銳騎三萬西踰隴。○勒監本誤勤。今改從南本。

孝閔皇帝紀洎公又躬宣重光。○又監本作入。今從南本。

始祖獻侯啓于遼海。○周書于作土。又下文五月己酉。

帝將觀漁於昆明池博士姜頊諫乃止句頊作須又
引宮伯張先洛句先作光

世宗明皇帝紀庚辰以大將軍輔城公邕為柱國○城
一本作成周書同然據高祖武皇帝紀年十二封輔
城郡公當以此為正

長安為萬年縣並居京城○居周書作治

建國剖符子唯休也○剖監本訛割今改從南本又子
周書作予

史臣論非求雄略冠時英姿不世○求周書作夫
至於渚宮制勝○宮監本訛官今改從南本

北史卷九考證

謹案卷八第十頁前四行仁統為丹陽王刊本脫
仁字據北齊書增

第十一頁前一行室韋刊本室訛宰今改

卷九第十六頁後六行慕容思慶刊本慶訛度據
周書改下同不復簽

第二十二頁前一行革變厥心刊本草訛弗據周
書改

欽定四庫全書

覆校官編修臣劉種之

校對官修撰臣張書勲

謄錄監生臣繆謨

欽定四庫全書薈要

史部
北史卷十

詳校官內閣侍讀臣孫球



欽定四庫全書舊要卷四千八百二十一

史部

北史卷十

唐 李

延

壽

撰

周本紀下第十

高祖武皇帝諱邕字禰羅突文帝第四子也母曰叱奴

太后魏大統九年生於同州有神光照室帝幼而孝敬
聰敏有器質文帝異之曰成吾志者此兒也年十二封
輔城郡公孝閔帝踐阼拜大將軍出鎮同州明帝即位

遷柱國授蒲州刺史入為大司空行御正進封魯國公
領宗師甚見親愛參議朝廷大事性沉深有遠識非因
問終無所言帝每歎曰夫人不言言必有中武成二年
四月帝崩遺詔傳位於帝帝固讓百官勸進乃從之壬
寅即皇帝位大赦冬十二月改作路門是歲齊孝昭帝
廢其主殷而自立

保定元年春正月戊申改元文武百官各增四級以大
冢宰晉公護為都督中外諸軍事令五府總於天官庚

戊祀圓丘壬子祀方丘甲寅祀感帝於南郊乙卯祭太社己巳享太廟班文帝所述六官於廟庭甲戌板授高年官各有差乙亥親耕藉田景子大射於正武殿賜百官各有差二月己卯遣大使巡察天下風俗甲午朝日於東郊景午省輦輿去百戲三月景寅改八丁兵為十二丁兵率歲一月役夏四月景子朔日有蝕之庚寅以少傅吳公尉遲綱為大司空丁酉白蘭遣使獻犀甲鐵鎧五月景午封孝閔皇帝子康為紀國公皇子寶為魯

國公晉公護獲玉斗以獻六月乙酉遣御正殷不害使
於陳秋七月戊申以旱故詔所在降死罪已下囚更鑄
錢文曰布泉以一當五與五銖並行九月甲辰南寧州
使獻滇馬及蜀鎧冬十月甲戌朔日有蝕之十一月乙
巳陳人來聘丁巳狩於岐陽是月齊孝昭帝殂十二月
車駕至自岐陽是歲突厥吐谷渾高昌宕昌龜茲等國
並遣使朝貢

二年春正月壬寅初於蒲州開河渠同州開龍首渠以

廣漑灌丁未以陳主弟頊為柱國送還江南閏月己亥
大司馬涼公賀蘭祥薨二月癸丑以久不雨宥罪人京
城三十里內禁酒梁主蕭譽薨夏四月甲辰以旱故禁
屠宰癸亥詔曰諸柱國等勲德隆重宜有優崇各準別
制邑戶聽寄食他縣五月庚午以南山衆瑞並集免今
年役及租賦之半壬辰以柱國隋公楊忠為大司空六
月己亥以柱國蜀公尉遲迥為大司馬分山南荊州安
州襄州江陵為四總管秋九月戊辰朔日有蝕之陳人

來聘冬十月辛亥帝御大武殿大射戊午講武於少陵
原十一月丁卯以大將軍衛公直趙公招並為柱國
三年春正月辛未改光遷國為遷州乙酉太保梁公侯
莫陳崇賜死二月庚子初頒新律辛酉詔自今舉大事
行大政非軍機急速皆依月令以順天心三月乙丑朔
日有蝕之景子宕昌國獻生猛獸二詔放之南山夏四
月乙未以柱國鄭公達奚武為太保大將軍韓果為柱
國己亥帝御正武殿錄囚徒癸卯大雩癸丑有牛足生

於背戊午幸太學以太傅燕公于謹為三老而問道焉
初禁天下報讎犯者以殺人論壬戌詔百官及庶人上
封事極言得失五月甲午朔以旱故避正寢不受朝甲
戌雨秋七月戊辰行幸原州庚午陳人來聘丁丑幸津
門問百年賜以金帛又賜高年板職各有差降死罪囚
一等八月丁未改作路寢九月甲子自原州登隴山景
戌幸同州戊子詔柱國楊忠率騎一萬與突厥伐齊己
丑初令世襲州郡縣者悉改為五等爵州封伯郡封子

縣封男冬十月庚戌陳人來聘十二月辛卯車駕至自
同州遣太保達奚武率騎三萬出平陽以應楊忠是月
有人生子男而陰在背後如尾兩足指如獸爪有犬生
子腰以後分為二身兩尾六足

四年春正月庚申楊忠破齊長城至晉陽而還二月庚
寅朔日有蝕之三月庚辰初令百官執笏夏四月癸卯
以柱國鄧公竇熾為大宗伯五月壬戌封明帝長子賢
為畢公癸酉以大將軍安武公李穆為柱國丁亥改禮

部為司宗大司禮為禮部大司樂為樂部六月庚寅改御伯為納言秋七月馬耆國遣使獻名馬八月丁亥朔

日有蝕之詔柱國楊忠帥師與突厥東伐至北河而還戊子以柱國齊公憲為雍州牧以許公宇文貴為大司徒九月丁巳以柱國衛公直為大司空陳人來聘是月以皇世母閭氏自齊至大赦閏月己亥以大將軍韋孝寬長孫儉並為柱國冬十月癸亥以大將軍陸通宇文盛蔡公廣並為柱國甲子詔大冢宰晉公護伐齊齋於

太廟庭授以斧鉞於是護總大軍出潼關大將軍權景
宣帥山南諸軍出豫州少師楊榘出軹關丁卯帝幸沙
苑勞師癸酉還宮十一月甲午柱國尉遲迥圍洛陽柱
國齊公憲營芒山晉公護次陝州十二月景辰齊豫州
刺史王士良以州降壬戌齊師度河晨至洛陽諸軍驚
散尉遲迥帥麾下數十騎扞敵得却至夜引還柱國王
雄力戰死之遂班師楊榘於軹關戰沒權景宣亦棄豫
州而還是歲突厥粟特等國並遣使朝貢

五年春正月甲申朔以柱國王雄死王事故廢朝乙巳
以雄世子謙為柱國二月辛丑詔陳公純等逆皇后于
突厥景寅以柱國李穆為大司空綏德公陸通為大司
寇壬申行幸岐州戊子柱國豆盧寧薨夏四月齊武成
帝禪位於其太子緯自稱太上皇帝五月己亥左右武
伯各置中大夫一人六月庚申彗星出三台入文昌犯
上將經紫宮入苑漸長丈餘百餘日乃滅辛未詔江陵
人年六十五已上為官奴婢者已令放免其公私奴婢

年七十以外者所在官司宜贖為庶人秋七月辛巳朔
日有蝕之庚寅行幸秦州降死罪已下刑辛丑遣大使
巡察天下八月景子車駕至自秦州冬十月辛亥改函
谷關城為通洛防十一月丁未陳人來聘是歲吐谷渾
遣使朝貢

天和元年春正月己卯朔日有蝕之辛巳考路寢命羣
臣賦古詩京邑耆老亦會焉頒賜各有差癸未大赦改
元百官普加四級己亥親耕藉田丁未於宕昌國置宕

州遣小載師杜果使於陳二月戊辰詔三公已下各舉所知庚午日鬪光遂微日中見烏三月景午祀南郊夏四月辛亥雩是月陳文帝殂五月庚辰帝御正武殿集羣臣親講禮記吐谷渾龍涸王莫昌率戶內附以其地為扶州甲午詔曰甲子乙卯禮云不樂養弘表昆吾之稔杜蕢有揚觶之文自世道喪亂禮儀紊毀此典茫然已墜於地宜依是日有事停樂庶知為君之難為臣不易貽之後昆殷鑒斯在六月景午以大將軍辛威為柱

國秋七月戊寅築武功郿斜谷武都留谷津坑諸城以
置軍人壬午詔諸胄子入學但束脩於師不勞釋奠釋
奠者學成之祭自今即為恒式八月己未詔諸有三年
之喪或負土成墳或寢苦骨立一志一行可稱獎者本
部官司隨事上言當加弔勉以勵薄俗九月乙亥信州
蠻反詔開府陸騰討平之冬十月甲子初造山雲儼以
備六代樂十一月景戌行幸武功等城十二月庚申還
宮

二年春正月癸酉朔日有蝕之己亥親耕藉田三月癸酉改武遊園為道會苑丁亥初立郊丘壇壝制度夏四月乙巳省併東南諸州以大將軍陳公純為柱國六月辛亥尊所生叱奴氏為皇太后閏月庚午地震戊寅陳湘州刺史華皎帥衆來附壬辰以大將軍譙公儉為柱國秋七月辛丑梁州上言鳳凰集楓樹羣鳥列侍以萬數甲辰立路門學置生七十二人壬子以太傅燕公于謹為雍州牧九月衛公直等與陳將淳于量吳明徹戰

于沌口王師敗績元定以步騎數千先度遂沒江南冬十一月戊戌朔日有蝕之癸丑太保許國公宇文貴薨是歲突厥吐谷渾安息等國並遣使朝貢

三年春正月辛丑祀南郊三月癸卯皇后阿史那氏至自突厥甲辰大赦丁未大會百寮及賓客於路寢戊午太傅燕公于謹薨夏四月辛巳以太保達奚武為太傅大司馬尉遲迥為太保柱國齊公憲為大司馬五月庚戌享太廟六月甲戌有星孛於東井秋七月壬寅柱國

隋公楊忠薨八月乙丑韓公元羅薨齊人來聘請和親
詔軍司馬陸逞報聘癸酉帝御大德殿集百寮及沙門
道士等親講禮記冬十月癸亥享太廟丁亥上親帥六
軍講武於城南京邑觀者輿馬瀰漫數十里諸蕃使咸
在焉十一月壬辰朔日有蝕之壬子遣開府崔彥穆使
於齊甲寅陳安成王頊廢其主伯宗而自立辛未齊武
成帝殂

四年春正月辛卯朔以齊武成殂故廢朝遣司會李綸

等會葬於齊二月戊辰帝御大德殿集百寮道士沙門
等討論釋老夏四月己巳齊人來聘五月己丑帝製象
經成集百寮講說封魏廣平公子元謙為韓國公以紹
魏後丁巳柱國吳公尉遲綱薨六月築原州及涇州東
城秋七月突厥遣使獻馬柱國昌寧公長孫儉薨

五年春三月甲辰初令宿衛官任關外者將家累入京
不樂者解宿衛夏四月甲寅以柱國宇文盛為大宗伯
省帥都督官丙寅遣大使巡察天下六月丙子以皇女

主故降宥罪人并免逋租懸調冬十月辛巳朔日有蝕
之丁酉太傅鄭公達奚武薨十一月丁卯柱國豳公廣
薨十二月癸巳大將軍鄭恪帥師平越舊置西寧州是
月齊將斛律光侵邊於汾北築城自華谷至龍門

六年春正月己酉朔以路門未成故廢朝丁卯以大將
軍王傑譚公會鴈門公田弘魏公李暉等並為柱國三
月己酉齊公憲自龍門度河斛律光退保華谷憲攻拔
其新築五城夏四月戊寅朔日有蝕之辛卯信州蠻反

遣大將軍趙閭帥師討平之庚子以大將軍司馬消難

侯莫陳瓊大安公閭慶神武公竇毅南陽公叱羅協平

高公侯伏侯龍恩並為柱國五月癸亥遣納言鄭詡使

於陳景寅以大將軍李諱中山公訓杞公亮上庸公陸

騰安義公宇文丘北平公寇紹許公宇文善捷為公高

琳鄭公達奚震隴東公楊纂常山公于翼並為柱國六

月乙未以大將軍太原公王秉為柱國是月齊將段孝

先攻陷汾州秋七月乙丑以大將軍越公盛為柱國八

月癸酉省掖庭四夷樂後宮羅綺工五百餘人冬十月
壬午冀公通薨乙未遣右武伯谷會琨使於齊壬寅上
親帥六軍講武於城南十一月壬子以大將軍梁公侯
莫陳芮大將軍李意並為柱國內辰齊人來聘丁巳行
幸散關十二月己丑還宮是冬牛疫死者十六七

建德元年春正月戊午帝幸元都觀親御法座講說公
卿道俗論難事畢還宮降死罪及流罪一等其五歲刑
已下並宥之二月癸酉遣大將軍昌城公深使於突厥

司宗李際使於齊乙酉柱國安義公宇文丘薨三月癸卯朔日有蝕之齊人來聘景辰誅大冢宰晉公護及其子柱國譚公會并柱國侯伏侯龍恩及其弟大將軍萬壽大將軍劉勇等大赦改元罷中外府癸亥以太傅尉遲迥為太師柱國竇熾為太傅大司空李穆為太保齊公憲為大冢宰衛公直為大司徒趙公招為大司空柱國辛威為大司寇綏德公陸通為大司馬詔曰人勞不止則星動於天作事不時則石言於國頃興造無度徵

發不已加以頻歲師旅農畝廢業去秋災蝗年穀不登
自今正調以外無妄徵發夏四月甲戌以代公達滕公
逌並為柱國己卯詔公卿已下各舉所知遣工部代公
達使於齊景戌詔百官軍人上封事極言得失丁亥詔
斷四方非常貢獻庚寅追尊略陽公為孝閔皇帝癸巳
立魯公贇為皇太子大赦百官各加封級五月壬戌以
大旱集百官於庭詔之曰亢陽不雨豈朕德薄刑賞乖
中歟將公卿大臣或非其人歟宜盡直言無有所隱公

卿各引咎自責其夜澍雨六月庚子改置宿衛官員秋
七月辛丑陳人來聘九月庚子朔日有蝕之庚申扶風
掘地得玉盃以獻冬十月庚午詔江陵所獲俘虜充官
口者悉免為百姓辛未遣小匠師楊勰使於陳大司馬
綏德公陸通薨十一月景午上親御六軍講武於城南
庚戌行幸羌橋集京城東諸都督以上頒賜各有差乙
卯還宮壬戌以大司空趙公招為大司馬十二月壬申
行幸斜谷集京城以西諸軍都督以上頒賜有差景戌

還宮己丑帝御正武殿親錄囚徒至夜而罷庚寅幸道會苑以上善殿壯麗遂焚之

二年春正月辛丑祀南郊乙巳以柱國田弘為大司空大將軍若干鳳為柱國庚戌復置帥都督官乙卯享太廟閏月己巳陳人來聘二月甲寅詔皇太子贊巡撫西土壬戌遣司會侯莫陳凱使於齊省雍州內八部併入京兆馮翊扶風咸陽等郡三月己卯皇太子於岐州獲白鹿二以獻詔答曰在德不在瑞癸巳省六府諸司中

大夫以下官府置四司以下大夫為官之長上士貳之
夏四月己亥享太廟丙辰增改東宮官員五月丁丑以
柱國侯莫陳瓊為大宗伯滎陽公司馬消難為大司寇
上庸公陸騰為大司空六月庚子省六府員外諸官皆
為丞壬子皇孫衍生文武官普加一級大階大選諸軍
將帥景辰帝御路寢集諸軍將勗以戎事庚申詔諸軍
旗旌皆畫以猛獸鷙鳥之象秋七月己巳享太廟自春
末不雨至於是月壬申集百寮於大德殿帝責躬罪己

問以時政得失戊子雨八月景午改三夫人為三妃關
中大蝗九月乙丑陳人來聘戊寅詔曰頃者婚嫁競為
奢靡有司宜加宣勒使遵禮制冬十月癸卯齊人來聘
甲辰奏六代樂成帝御崇信殿集百官觀之十一月辛
巳帝親帥六軍講武於城東癸未集諸軍都督以上五
十人於道會苑大射帝親臨射堂大備軍容十二月癸
巳集羣官及沙門道士等帝升高座辨釋三教先後以
儒教為先道教次之佛教為後以大將軍赫連達為柱

國詔軍人之間年多者壽可頒授老職使榮沾邑里戊午聽訟於正武殿自旦及夜繼之以燭

三年春正月壬戌朝羣臣於路門冊柱國齊公憲衛公直趙公招譙公儉陳公純越公盛代公達滕公迥並進爵為王己巳享太廟庚午突厥遣使獻馬癸酉詔自今男年十五女年十三以上爰及鰥寡所在以時嫁娶務從節儉乙亥親耕藉田景子初服短衣享二十四軍督將以下試以軍旅之法縱酒盡歡詔以往歲年穀不登

令公私道俗凡有貯積粟麥者皆準口聽留已外盡糶
二月壬辰朔日有蝕之丁酉紀公康畢公賢鄆公貞宋
公實漢公贊秦公贄曹公允並進爵為王景午令六府
各舉賢良清正之士癸丑柱國許公宇文善有罪免景
辰大赦三月癸酉皇太后叱奴氏崩帝居倚廬朝夕共
一溢米羣臣表請累旬乃止詔皇太子贇總庶政夏四
月乙卯齊人來弔贈會葬丁巳有星孛於東井五月庚
申葬文宣后於永固陵帝袒跣至陵所辛酉詔曰齊斬

之情經籍彙訓近代沿革遂亡斯禮伏奉遺令既葬便
除攀慕几筵情實未忍三年之喪達於天子古今無易
之道王者之所常行但時有未諧不得全制軍國務重
庶自聽朝衰麻之節苦廬之禮率遵前典以申罔極百
寮以下宜遵遺令公卿上表固請俯就權制過葬即吉
帝不許引古答之羣臣乃止於是遂申三年之制五服
之內亦令依禮初置太子諫議員四人文學十人皇子
皇弟友員各二人學士六人戊辰詔故晉公護及諸子

並追復先封改葬加謚景子初斷佛道二教經像悉毀
罷沙門道士並令還俗并禁諸淫祀非祀典所載者盡
除之六月丁未集諸軍將教以戰陣之法壬子更鑄五
行大布錢以一當十與布泉錢並行戊午詔曰至道弘
深混成無際體包空有理極幽玄但岐路既分源流逾
遠淳離朴散形器斯乖遂使三墨八儒朱紫交競九流
七略異說相騰道隱小成其來舊矣不有會歸爭驅靡
息今可立通道觀聖哲微言先賢典訓金科玉篆祕蹟

玄文可以濟養黎元扶成教義者並宜弘闡一以貫之
俾夫翫培塿者識高低之崇崛守磧礫者悟渤澥之泓
澄不亦可乎秋七月庚申行幸雲陽宮乙酉衛王直在
京反欲突入肅章門司武尉遲運等拒守直敗遁走戊
子車駕至自雲陽宮八月辛卯禽直於荊州免為庶人
冬十月景申詔御正楊尚希使於陳庚子詔蒲州人遭
饑乏絕者令向鄆城以西及荊州管內就食甲寅行幸
蒲州乙卯曲赦蒲州見囚大辟以下景辰行幸同州十

一月戊午于闐遣使獻名馬己巳大閱於同州城東甲戌車駕至自同州十二月戊子大會衛官及軍人以上賜錢帛各有差景申改諸軍軍人並名侍官癸卯集諸軍講武於臨臯澤涼州比年地震壞城郭地裂涌泉出四年春正月戊辰初置營軍器監壬申布寬大之詔多所蠲免二月景戌朔日有蝕之辛卯改置宿衛官員己酉柱國廣德公李意有罪免三月景辰遣小司寇元衛使於齊郡縣各省主簿一人甲戌以柱國趙王招為雍

州牧夏四月甲午柱國燕公于實有罪免丁酉初令上書者並為表於皇太子以下稱啓秋七月己未禁五行大布錢不得出入關布泉錢聽入而不聽出甲戌陳人來聘景子召大將軍以上於大德殿帝親諭以伐齊之旨言往以政出權宰無所措懷自親覽萬機便圖東討惡衣菲食繕甲練兵數年以來戰備稍足而偽主昏虐恣行無道伐暴除亂斯實其時羣臣咸稱善丁丑下詔暴齊氏過惡以柱國陳王純為前一軍總管滎陽公司

馬消難為前二軍總管鄭公達奚震為前三軍總管趙
王盛為後一軍總管周昌公侯莫陳瓊為後二軍總管
趙王招為後三軍總管齊王憲帥衆二萬趣黎陽隋公
楊堅廣寧公侯莫陳迴舟師三萬自渭入河柱國梁公
侯莫陳芮帥衆一萬守太行道申國公李穆帥衆三萬
守河陽道常山公于翼帥衆二萬出陳汝壬午上親帥
六軍衆六萬直指河陰八月癸卯入齊境禁伐樹殘苗
稼犯者以軍法從事丁未上親帥諸軍攻拔河陰大城

攻子城未剋上有疾九月辛酉夜班師水軍焚舟而退
齊王憲于翼李穆等所在剋捷降拔三十餘城皆棄而
不守唯以王藥城要害令儀同三司韓正守之正尋以
城降齊戊寅至自東伐冬十月戊子初置上柱國上大
將軍官改開府儀同三司為開府儀同大將軍又置上
開府上儀同官閏月以柱國齊王憲蜀公尉遲迥為上
柱國詔諸畿郡各舉賢良十一月己亥改置司內官員
十二月辛亥朔日有蝕之丙子陳人來聘是歲岐寧二

州人饑開倉賑恤

五年春正月辛卯行幸河東涑川集關河東諸軍校獵
甲午還同州丁酉詔分遣大使周省四方察訟聽謠問
人卹隱廢布泉錢戊申初令鑄錢者至絞從者遠配二
月辛酉遣皇太子贊巡撫西土仍討吐谷渾三月壬寅
車駕至自同州文宣皇太后服再暮戊申祥夏六月戊
申朔日有蝕之辛亥享太廟景辰利州總管紀王康有
罪賜死秋七月乙未京師旱八月戊申皇太子入吐谷

渾至伏俟城而還乙丑陳人來聘九月丁丑大醮於正
武殿以祈東伐冬十月帝復諭羣臣伐齊以去歲屬有
疹疾遂不得剋平逋寇于時出軍河外直為撫背未扼
其喉然晉州本高歡所起統攝要重今往攻之彼必來
援嚴軍以待擊之必剋然後乘破竹之勢鼓行而東足
以窮其窟穴諸將多不願行帝曰機者事之微不可失
矣沮軍事者以軍法裁之己酉帝總戎東伐以越王盛
為右一軍總管杞公亮為右二軍總管隋公楊堅為右

三軍總管譙王儉為左一軍總管大將軍竇泰為左二軍總管廣化公丘崇為左三軍總管齊王憲陳王純為前軍癸亥帝至晉州遣齊王憲帥精騎二萬守雀鼠谷陳王純步騎二萬守千里徑鄭公達奚震步騎一萬守統軍川大將軍韓明步兵五千守齊子嶺烏氏公尹升步騎五千守鼓鍾鎮涼城公辛韶步騎五千守蒲津關柱國趙王招步騎一萬自華谷攻汾州諸城柱國宇文盛步兵一萬守汾水關遣內史王誼監六軍攻晉州城

帝屯於汾曲齊王憲攻洪洞永安二城並拔之是夜虹見於晉州城上首向南尾入紫宮帝每日自汾曲赴城下親督戰庚午齊行臺左丞侯子欽出降壬申齊晉州刺史崔嵩夜密使送款上開府王軌應之未明登城遂剋晉州甲戌以上開府梁士彥為晉州刺史以鎮之十一月己卯齊主自并州帥衆來援帝以其兵新集且避之乃詔諸軍班師齊主遂圍晉州齊王憲屯諸軍於涑水為晉州聲援河東地震癸巳至自東伐獻俘於太廟

景申放齊諸城鎮降人還丁酉帝發京師壬寅度河與諸軍合十二月戊申次晉州庚戌帝帥諸軍八萬置陣東西二十餘里乘常御馬從數人巡陣所至輒呼主帥姓名以慰勉之將士感見知之恩各思自厲將戰有司請換馬帝曰朕獨乘良馬何所之齊主亦於塹北列陣申後齊人填塹南引帝大喜勒諸軍擊之齊人便退齊主與其麾下數十騎走還并州齊衆大潰軍資甲仗數百里間委棄山積辛亥帝幸晉州仍率諸軍追齊主諸

將固請還師帝曰縱敵患生卿等若疑朕將獨往諸將不敢言甲寅齊主遣其丞相高阿那肱守高壁帝麾軍直進那肱望風退散景辰師次介休齊將韓建業舉城降以為上柱國封郇國公丁巳大軍次并州齊主留其從兄安德王延宗守并州自將輕騎走鄴是日詔齊王公以下示以逆順之道於是齊將帥降者相繼戊午高延宗僭即偽位改年曰德昌己卯軍次并州帝帥諸軍合戰齊人退帝逐北及城東門諸軍繞城置陣至夜延

宗帥其衆排陣而前城中軍却人相蹂踐大為延宗所
敗齊人欲閉門以閹下積尸扉不得闔帝從數騎崎嶇
危險僅得出門至明帥諸軍更戰大破之禽延宗并州
平壬戌詔曰昔天厭水運龍戰於野兩京否隔四紀于
茲朕垂拱巖廊君臨宇縣相邠人於海內混楚弓於天
下一物失所有若推溝方欲德綏未服義征不諛偽主
高緯放命燕齊怠慢典刑倣擾天紀加以背惠怒隣棄
信忘義朕應天從物伐罪弔人一鼓而蕩平陽再舉而

推強敵偽署王公相繼道左高緯智窮數屈逃竄草間
偽安德王高延宗擾攘之間遂竊名號與偽齊王莫
多婁敬顯等收合餘燼背城借一王威既振魚潰鳥離
破竹更難建瓴非易延宗衆散衿甲軍門根本既傾枝
葉自實幽青海岱折簡而來冀北河南傳檄可定八紘
共貫六合同風方當偃伯靈臺休牛桃塞無疆之慶非
獨在予漢皇約法除其苛政姬王輕典刑彼新邦思覃
惠澤被之率土新集臣庶皆從蕩滌可大赦天下高緯

及王公以下若釋然歸順咸許自新諸亡入偽朝亦從

寬宥官榮次序依例無失齊制偽令即宜削除鄒魯縉
紳幽并騎士一介可稱並宜銓錄景寅出齊宮中金銀
寶器珠玉麗服及宮女二千人班賜將士以柱國趙王
招陳王純越王盛杞公亮梁公侯莫陳芮庸公王謙北
平公寇紹鄭公達奚震並為上柱國封齊王憲子安城
郡公質為河間王諸有功者封授各有差癸酉帝帥六
軍趣鄴

六年春正月乙亥齊主傳位於其太子恒改年曰承光
自號太上皇壬辰帝至鄴癸巳帥諸軍圍之齊人拒守
諸軍奮擊大破之遂平鄴齊主先送其母及妻子於青
州及城陷帥數十騎走青州遣大將軍尉遲勤追之是
戰也於陣獲其齊昌王莫多婁敬顯帝數之曰汝有死
罪三前從并州走鄴棄母攜妻妾是不孝外為僞主戮
力內實通啓於朕是不忠送款之後猶持兩端是不信
如此用懷不死何待遂斬之是日西方有聲如雷甲子

帝入鄴城詔去年大赦班宣未及之處皆從赦例己亥
詔曰晉州大陣至鄴身殞戰場者其子即授父本官尉
遲勤禽齊主及其太子恒於青州庚子詔曰偽齊之末
姦佞擅權濫罰淫刑動挂羅網偽右丞相咸陽王故斛
律明月偽侍中特進開府故崔季舒等七人或功高獲
罪或直言見誅朕兵以義動翦除凶暴表閭封墓事切
下車宜追贈謚并加窆措其見在子孫各隨蔭叙錄家
口田宅沒官者并還之辛丑詔偽齊東山南園及三臺

並毀撤瓦木諸物凡入用者盡賜百姓山園之田各還
本主二月景午論定諸軍勲置酒於齊太極殿會軍士
以上班賜有差丁未齊主至帝降自阼階見以賓主禮
齊任城王湝在冀州擁兵未下遣上柱國齊王憲與柱
國隋公楊堅討平之齊范陽王高紹義叛入突厥齊諸
行臺州鎮悉降關東平合州五十五郡一百六十二縣
三百八十五戶三百三十萬二千五百八十八口二千
萬六千八百八十六乃於河陽及幽青南兗豫徐北朔

定州置總管府相并二總管各置官及六府官癸丑詔
自偽武平三年以來河南諸州人偽齊破掠為奴婢者
不問公私並放免之其住在淮南者亦即聽還願住淮
北者可隨便安置癘疾孤老不能自存者所在矜恤乙
卯車駕發自鄴三月壬午詔山東諸州各舉士夏四月
乙巳至自東伐列齊主於前其王公等並從車輿旌旗
及器物以次陳於其後大駕布六軍備凱樂獻俘於太
廟京邑觀者皆稱萬歲戊申封齊王為溫國公庚戌大

會羣臣及諸蕃客於路寢乙卯廢蒲陝涇寧四州總管
己巳享太廟詔分遣使人巡方撫慰觀風省俗五月丁
丑以柱國譙王儉為大冢宰庚辰以上柱國杞公亮為
大司徒鄭公達奚震為大宗伯梁公侯莫陳芮為大司
馬柱國應公獨孤永業為大司寇鄭公韋孝寬為大司
空辛巳大醮於正武殿以報功己丑祀方丘詔曰往者
冢臣專任制度有違正殿別寢事窮壯麗非直彫牆峻
宇深戒前王而締構弘敞有踰清廟不軌不物何以示

後兼東夏初平人未見德率先海內宜自朕始其路寢
會義崇信含仁雲和思齊諸殿等農隙之時悉可毀撤
彫斲之物並賜貧人繕造之宜務從卑朴戊戌詔曰京
師宮殿已從撤毀并鄴二所華侈過度誠復作之非我
豈容因而弗草諸堂殿壯麗並宜除蕩薨宇雜物分賜
窮人三農之隙別漸營構止蔽風雨務在卑狹庚子陳
人來聘是月青城門無故自崩六月辛亥御正武殿錄
囚徒甲子東巡丁卯詔曰自今不得娶母同姓以為妻

妾秋七月景戌行幸洛州己丑詔山東諸州舉有才望者赴行在所共論政事得失八月壬寅議權衡度量頒於天下其不依新式者悉追停之詔曰以刑止刑以輕代重罪不及嗣皆有定科雜役之徒獨異常憲一從罪配百代不免罰既無窮刑何以措凡諸雜戶悉放為百姓配雜之科因之永削甲子鄭州獻九尾狐皮肉銷盡骨體猶具帝曰瑞應之來必昭有德若使五品時序四海和平家識孝慈乃能致此今無其時恐非實錄乃令

焚之九月壬申以柱國鄭公竇熾申公李穆為上柱國
戊寅初令庶人以上非朝祭之服唯得衣綢綿綢絲布
圓綾紗絹綃葛布等九種壬辰詔東土諸州儒生明一
經以上並舉送州郡以禮發遣冬十月戊申行幸鄴宮
戊午改葬德皇帝於冀州帝服總哭於太極殿百官素
服哭是月誅溫公高緯十一月壬申封皇子克為道王
克為蔡王癸酉陳將吳明徹侵呂梁徐州總管梁士彥
與戰不利退守徐州遣上大將軍鄭公王軌討之是月

稽胡反遣齊王憲討平之詔自永熙三年七月以來十月以前東土人被鈔在化內為奴婢者及平江陵日良人沒為奴婢者並免同人伍詔曰正位於中有聖通典質文相草損益不同五帝則四星之象三王制六宮之數劉曹已降等列彌繁選擇徧於生靈命秩方於庶職椒房丹地有衆如雲本由嗜欲之情非關風化之義朕運當澆季思復古始弘贊後庭事從簡約可置妃二人世婦三人御妻三人自茲以外宜悉減省己亥晦日有

蝕之初行刑書要制持杖羣強盜一足以上不持杖羣強盜五足以上監臨主掌自盜二十足以上小盜及詐請官物三十足以上正長隱五戶及十丁以上隱地三頃以上皆至死刑書所不載者自依律科十二月北營州刺史高寶寧據州反庚申行幸并州宮移并州軍人四萬戶於關中戊辰廢并州宮及六府是歲吐谷渾百濟並遣使朝貢

宣政元年春正月癸酉吐谷渾僞趙王他婁屯來降壬

午行幸鄴宮辛卯幸懷州癸巳幸洛州詔於懷州置宮
二月甲辰柱國大冢宰譙王儉薨丁巳車駕至自東巡
乙丑以上柱國越王盛為大冢宰陳王純為雍州牧三
月戊辰於蒲州置宮廢同州及長春二宮壬申突厥遣
使朝貢甲戌初服常冠以皂紗為之加簪而不施纓導
其制若今之折角巾也上大將軍王軌破陳師於呂梁
禽其將吳明徹等俘斬三萬餘人丁亥詔柱國豆盧寧
征江南武陵南平等郡所有士庶為人奴婢者悉依江

陵放免壬辰改元夏四月壬子初令遭父母喪者聽終
制庚申突厥入寇幽州五月己丑帝總戎北伐遣柱國
原公姬願東平公宇文神舉等五道俱入發關中公私
馬驢悉從軍癸巳帝不豫止於雲陽宮景申詔停諸軍
六月丁酉帝疾甚還京其夜崩於乘輿時年三十六遺
詔曰人肖形天地稟質五常修短之期莫非命也朕君
臨宇縣十有九年未能使百姓安樂刑措不用未旦求
衣分宵忘寢昔魏室將季海內分崩太祖扶危翼傾肇

開王業燕趙榛蕪又竊名號朕上述先志下順人心遂
與王公將帥共平東夏雖復祆氛蕩定而人勞未康每
一念如此若臨米谷將欲色舉六合混同文軌今邁疾
大漸力氣稍微有志不申以此歎息天下事重萬機不
易王公以下爰及庶寮宜輔導太子副朕遺意今上不
負太祖下無失為臣朕雖瞑目九泉無所復恨朕平生
居處每存菲薄非直以訓子孫亦乃本心所好喪事資
用須使儉而合禮墓而不墳自古通典隨吉即葬葬訖

公除四方士庶各三日哭妃嬪以下無子者悉放還家
謚曰武皇帝廟稱高祖己未葬於孝陵帝沉毅有智謀
初以晉公護專權常自晦迹人莫測其深淺及誅護之
後始親萬機剋己勵精聽覽不怠用法嚴整多所罪殺
號令懇惻唯屬意於政羣下畏服莫不肅然性既明察
少於恩惠凡布懷立行皆欲踰越古人身衣布袍寢布
被無金寶之飾諸宮殿華綺者皆撤毀之改為土階數
尺不施櫨栱其彫文刻鏤錦繡纂組一皆禁斷後宮嬪

御不過十餘人勞謙接下自強不息以海內未康銳情
教習至於校兵閱武步行山谷履涉勤苦皆人所不堪
平齊之後見軍行有跣行者帝親脫靴以賜之每宴會
將士必自執盃勸酒或手付賜物至於征伐之處躬在
行陣性又果決能斷大事故能得士卒死力以弱制強
破齊之後遂欲窮兵極武平突厥定江南一二年間必
使天下一統此其志也

宣皇帝諱贇字乾伯武帝長子也母曰李太后武成元

年生於同州保定元年五月景午封魯國公建德元年
四月癸巳武帝親告廟冠於阼階立為皇太子二年詔
皇太子巡撫西土文宣后崩武帝諒闇詔太子總朝政
五旬而罷武帝每巡幸四方太子常留監國五年二月
又詔太子巡西土因討吐谷渾宣政元年六月丁酉武
帝崩戊戌太子即皇帝位尊皇后曰皇太后甲子誅上
柱國齊王憲閏月乙亥詔山東流人新復業及突厥侵
掠家口破亡不能存濟者給復一年立妃楊氏為皇后

辛巳以上柱國趙王招為太師陳王純為太傅柱國代
王達滕王迥盧公尉遲運薛公長孫覽並為上柱國是
月幽州盧昌期據范陽反詔柱國東平公宇文神舉討
平之秋七月乙巳享太廟景午祀圓丘戊申祀方澤庚
戌以小宗伯岐公斛斯徵為大宗伯壬戌以南兗州總
管隋公楊堅為上柱國大司馬癸亥尊所生李氏為帝
太后八月景寅夕月於西郊長安萬年二縣人居京城
者給復三年壬申幸同州遣大使巡察諸州制九條宣

下州郡其母族絕服外者聽婚以上柱國薛公長孫覽
為大司徒柱國楊公王誼為大司空景戌以柱國永昌
公椿為大司寇九月丁酉以柱國宇文盛張掖公王傑
枹罕公辛威鄖國公韋孝寬並為上柱國庚戌封皇弟
元為荊王詔諸應拜者皆以三拜成禮冬十月癸酉至
自同州戊子百濟遣使朝貢十一月己亥講武於道會
苑帝親擐甲是月突厥犯邊圍酒泉殺掠吏士十二月
甲子以柱國畢王賢為大司空己丑以上柱國河陽總

管滕王逌為行軍元帥伐陳免京師見徒並令從軍

大象元年春正月己丑受朝於路門帝服通天冠絳紗袍羣臣皆服漢魏衣冠大赦改元為大成初置四輔官以大象宰越王盛為大前疑蜀公尉遲迥為大右弼申公李穆為大左輔大司馬隋公楊堅為大後丞癸卯封皇子衍為魯王甲辰東巡景午以柱國常山公于翼為大司徒辛亥以柱國許公宇文善為大宗伯戊午行幸洛陽立魯王衍為皇太子二月癸亥詔曰河洛之地舊

稱朝市自魏氏失馭城闕為墟我太祖受命鄴鎬有懷
光宅高祖往巡東夏布政此宮朕以眇身祇承寶運雖
庶幾聿修之志敢忘燕翼之心一昨駐蹕金墉備嘗遊
覽百王制度基址尚存今若因循為功易立宜命邦事
修復舊都奢儉取文質之間功役依予來之義北瞻河
內咫尺非遙前詔經營今宜停罷於是發山東諸州兵
增一月功為四十五日後起洛陽宮常役四萬人以迄
晏駕并移相州六府於洛陽稱東京六府殺柱國徐州

總管郟公王軌停南討諸軍以趙王招女為千金公主嫁於突厥乙亥行幸鄴景子初令總管刺史行兵者加持節餘悉罷之辛巳詔傳位於皇太子衍大赦改元大成為大象帝於是自稱天元皇帝所居稱天臺冕二十有四旒車服旗鼓皆以二十四為節內史御史正皆置上大夫皇帝衍稱正陽宮置納言御史諸衛等官皆准天臺尊皇太后為天元皇太后癸未日出將入時其中並有烏色大如鷄卵經四日乃滅戊子以大前疑越王盛

為太傅大右弼蜀公尉遲迥為大前疑代王達為大右
弼辛卯詔徙鄴城石經於洛陽又詔洛陽凡是元遷戶
並聽還洛州此外欲往者聽之河陽幽相豫毫青徐七
總管受東京六府處分三月庚申車駕至自東巡大陳
軍伍親擐甲胄入自青門皇帝行備法駕從百官迎於
青門外是時驟雨儀衛失容辛酉封趙王招第二子貫
為永康縣王夏四月壬戌朔有司奏言日蝕不視事過
時不蝕乃臨軒立妃朱氏為天元帝后癸亥以柱國畢

王賢為上柱國己巳享太廟壬午大醮於正武殿五月
辛亥以洺州襄國郡為趙國齊州濟南郡為陳國豐州
武當安富二郡為越國潞州上黨郡為代國荊州新野
郡為滕國邑各一萬戶令趙王招陳王純越王盛代王
達滕王逌並之國是月遣使簡視京城及諸州士庶女
充選後宮突厥寇并州六月咸陽有池水變為血徵山
東諸州人修長城秋七月庚寅以大司空畢王賢為雍
州牧大後丞隋公楊堅為大前疑柱國榮陽公司馬消

難為大後丞景申納大後丞司馬消難女為正陽宮皇后己酉尊帝太后李氏為天皇太后壬子改天元帝后朱氏為天皇后立妃元氏為天右皇后妃陳氏為天左皇后八月庚申幸同州壬申還宮甲戌以天左皇后父大將軍陳山提天右皇后父開府元晟並為上柱國初武帝作刑書要制用法嚴重及帝即位恐物情未附除之至是為刑經聖制其法深刻大醮於正武殿告天而行焉壬午以上柱國雍州牧畢王賢為太師上柱國卽

公韓建業為大左輔是月所在螳羣鬪各四五尺死者
十八九九月己卯以鄴王貞為大冢宰上柱國鄖公韋
孝寬為行軍元帥率行軍總管杞公亮郕公梁士彥伐
陳遣御正杜果使於陳冬十月壬戌幸道會苑大醺以
高祖武皇帝配醺初復佛象及天尊象帝與二象俱南
坐大陳雜戲令京城士庶縱觀是月相州人段德舉謀
反伏誅十一月乙未夜行幸同州壬寅還宮乙巳初鑄
永通萬國錢以一當千與五行大布並行是月韋孝寬

拔壽陽杞國公亮拔黃城梁士彥拔廣陵陳人退走於是江北盡平十二月戊午以災異屢見帝御路寢見百官詔曰朕以寡德君臨區寓始於秋季及此玄冬幽憂殷勤屢貽深戒至有金入南斗木犯軒轅熒惑干房又與土合流星照夜東南而下然則南斗主於爵祿軒轅為於後宮房曰明堂布政所也火土則憂孽之兆流星乃兵凶之驗豈其宮人失序女謁尚行行政事乖方憂患將至何其昭著若斯之甚將避正寢齋居克念惡衣減

膳去飾徹懸披不諱之誠開直言之路欲使刑不濫及
賞弗踰等選舉以才宮闈修德宜宣諸內外庶盡弼諧
允叶人心用消天譴於是舍仗衛往天興宮百官上表
勸復寢膳許之甲子還宮御正武殿集百官及宮人內
外命婦大列妓樂又縱胡人乞寒用水澆沃以為戲樂
乙丑行幸洛陽帝親御驛馬日行三百里四皇后及文
武侍衛數百人並乘驛以從令四后方駕齊驅或有先
後便加譴責人馬頓仆相屬於道己卯還宮

二年春正月丁亥帝受朝于道會苑癸巳享太廟乙巳
造二宸畫日月象以置左右戊申雨雪雪止又雨細黃
土移時乃息乙卯詔江右諸州新附人給復二十年初
稅入市者人一錢二月丁巳帝幸路門學行釋奠禮戊
午突厥遣使獻方物且逆千金公主乙丑改制詔為天
制勅為天勅尊天元皇太后為天元上皇太后天皇太
后李氏曰天元聖皇太后癸未立天元皇后楊氏為天
元大皇后天后朱氏為天大皇后天右皇后元氏為

天右大皇后天左皇后陳氏為天左大皇后正陽宮皇后直稱皇后是月洛陽有禿鶯鳥集新太極殿前榮州有黑龍見與赤龍鬪於汴水側黑龍死三月丁亥賜百官及百姓大鋪詔進封孔子為鄒國公邑數準舊并立後承襲別於京師置廟以時祭奠戊子行軍總管杞公亮舉兵反行軍元帥韋孝寬獲而殺之辛卯行幸同州增候正前驅戒道為三百六十重自應門至赤岸澤數十里間幡旗相蔽鼓樂俱作又令武賁持鉞馬上稱警

蹕以至同州乙未改同州宮為天成宮庚子車駕至自
同州詔天臺侍衛皆着五色及紅紫綠衣以雜色綠名
曰品色衣有大事與公服間服之壬寅詔內外命婦皆
執笏其拜宗廟及天臺皆俛伏甲辰初置天中大皇后
立天左大皇后陳氏為天中大皇后立妃尉遲氏為天
左大皇后夏四月己巳享太廟己卯以旱故降見囚死
罪已下壬午幸中山祈雨至咸陽宮雨降甲申還宮令
京城士女於衢巷作音樂以迎候五月甲午帝備法駕

幸天興宮乙未帝不念還宮詔揚州總管隋公楊堅入侍疾丁未追趙越陳代滕五王入朝己酉大漸御正下大夫劉昉與內史上大夫鄭譯矯制以隋公楊堅受遺輔政是日帝崩於天德殿時年二十二謚宣皇帝七月景申葬定陵帝之在東京也武帝慮其不堪承嗣遇之甚嚴朝見進止與諸臣無異雖隆寒盛暑亦不得休息性嗜酒武帝遂禁醪醴不許至東宮帝每有過輒加捶扑嘗謂之曰古來太子被廢者幾人餘兒豈不堪立邪

於是遣東宮官屬錄帝言語動作每月奏聞帝懼威嚴
矯情修飾以是惡不外聞嗣位之初方逞其欲大行在
殯曾無戚容即通亂先帝宮人纔踰年便恣聲樂采擇
天下子女以克後宮好自矜夸飾非拒諫禪位之後彌
復驕奢耽酗於後宮或旬日不出公卿近臣請事者皆
附閹官奏之所居宮殿帷帳皆飾以金玉珠寶光華炫
耀極麗窮奢及營洛陽宮雖未成畢其規摹壯麗踰於
漢魏遠矣唯自尊崇無所顧憚國典朝儀率情變改後

宮位號莫能詳錄每對臣下自稱為天以五色土塗所
御天德殿各隨方色又於後宮與皇后等列坐用宗廟
禮器罇彝珪瓚之屬以次食馬及令羣臣朝天臺者致
齋三日清身一日車旗章服倍於前王之數既自比上
帝不欲令人同己常自帶綬及冠通天冠加金附蟬顧
見侍臣武弁上有金蟬及王公有綬者並令去之又
不聽人有高者大者之稱諸姓高者改為姜九族稱高祖
者為長祖曾為次長祖官稱名位凡謂上及大者改為

長有天者亦改之又令天下車皆渾成為輪禁天下婦人皆不得施粉黛唯宮人得乘有輜車加粉黛焉西陽公溫杞公亮之子即帝從祖兄其妻尉遲氏有容色因入朝帝遂飲以酒逼而媵之亮聞之懼謀反纔誅溫即追尉遲氏入宮初為妃尋立為皇后每左右侍臣論議唯欲興造革易未嘗言及政事其後遊戲無恒出入不節羽儀仗衛晨出夜還或幸天興宮或遊道會苑陪侍之官皆不堪命散樂雜戲魚龍爛漫之伎常在目前好

令京城少年為婦人服飾入殿謔舞與後宮觀之以為
喜樂擯斥近臣多所猜怨又吝於財略無賜與恐羣臣
規諫不得行己之志常遣左右密伺察之動止所為莫
不抄錄小有乖違輒加其罪自公卿以下皆被楚撻其
間誅戮黜免者不可勝言每捶人皆以百二十為度名
曰天杖宮人內職亦如之后妃嬪御雖被寵嬖亦多被
杖背於是內外恐懼人不自安皆求苟免莫有固志重
足累息以逮於終矣

靜皇帝諱衍後改名闡宣帝之長子也母曰朱皇后建德二年六月生于東宮大象元年正月癸卯封魯王戊午立為皇太子二月辛巳宣帝於鄴宮傳位授帝居正陽宮二年五月乙未宣帝寢疾詔帝入宿路門學己酉宣帝崩帝入居天臺廢正陽宮大赦停洛陽宮作庚戌上天元上皇太后尊號為太皇太后天元聖皇太后李氏為大帝太后天元太皇后楊氏為皇太后天太皇后朱氏為帝太后其天中大皇后陳氏天右大皇后元氏

天左大皇后尉遲氏並出俗為尼以柱國漢王贊為上
柱國右大丞相上柱國揚州總管隋公楊堅為假黃鉞
左大丞相柱國秦王贇為上柱國帝居諒闇百官總已
以聽於左大丞相壬子以上柱國鄭公韋孝寬為相州
總管罷入市稅錢六月戊午以柱國許公宇文善神武
公竇毅修武公侯莫陳瓊大安公閭慶並為上柱國趙
王招陳王純越王盛代王達滕王逌來朝庚申復佛道
二教辛酉以柱國杞公椿燕公于寔却公賀拔伏恩並

為上柱國甲子相州總管尉遲迴舉兵不受代詔發關
中兵即以韋孝寬為行軍元帥討之柱國畢王賢以謀
執政被誅以上柱國秦王贄為大冢宰杞公椿為大司
徒己巳詔南定北光衡巴四州人為宇文亮抑為奴婢
者並免之甲戌有赤氣起西方漸東行徧天庚辰罷諸
魚池及山澤公禁者與百姓共之以柱國蔣公梁睿為
益州總管秋七月甲申突厥送齊范陽王高紹義庚寅
申州刺史李惠起兵庚子詔趙陳越代滕五王入朝不

趙劒履上殿榮州刺史邵公宇文弔舉兵遣大將軍楊
素討之青州總管尉遲綱舉兵丁未隋公楊堅都督內
外諸軍事己酉鄆州總管司馬消難舉兵以柱國楊公
王誼為行軍元帥討之壬子趙王招越王盛以謀執政
被誅癸丑封皇弟術為鄴王術為郢王是月豫州襄州
總管諸蠻各帥種落反八月庚申益州總管王謙舉兵
不受代即以梁睿為行軍元帥討之庚午韋孝寬破尉
遲迴於鄴迴自殺相州平移相州於安陽其鄴城及邑

毀廢之景子以漢王贊為太師以上柱國并州總管申
公李穆為太傅以宋王實為大前疑以秦王贇為大右
弼以燕公于實為大左輔己卯以尉遲迥平大赦庚辰
司馬消難擁衆以魯山甑山二鎮奔陳遣大將軍元景
山追擊之鄆州平沙州氏帥開府楊永安聚衆反應王
謙遣大將軍達奚儒討之楊素破宇文冑於滎陽斬之
以上柱國神武公竇毅為大司馬以齊公于智為大司
空廢相青荆金晉梁州六總管九月景戌廢河陽總管

為鎮隸洛州以小宗伯竟陵公楊慧為大宗伯壬辰廢
皇后司馬氏為庶人戊戌以柱國楊公王誼為上柱國
庚戌以柱國常山公于翼化政公宇文忻並為上柱國
壬子丞相去左右號隋公楊堅為大丞相冬十月甲寅
日有蝕之壬戌陳王純以怨執政被誅大丞相隋公楊
堅加大冢宰五府總於天官戊寅梁睿破王謙斬之傳
首京師益州平十一月甲辰達奚儒破楊永安沙州平
丁未上柱國鄭公韋孝寬薨十二月壬子以柱國蔣公

梁審為上柱國丁巳以柱國邠公楊雄普安公賀蘭蕃
郕公梁士彥上大將軍新寧公叱列長文武鄉公崔弘
度大將軍中山公宇文恩濮陽公宇文述渭原公和干
子任城公王景漁陽公楊銳上開府廣宗公李崇隴西
公李詢並為上柱國庚申以柱國楚公豆盧勣為上柱
國癸亥詔曰太祖受命龍德猶潛三分天下志扶魏室
多所改作冀允上玄文武羣官賜姓者衆本殊國邑實
乖胙土不歆非類異骨肉而共蒸嘗不愛其親嗟行路

而叙昭穆且神徵革姓本為歷數有歸天命在人推讓
終而弗獲故君臨區宇累世於茲可不仍遵謙挹之旨
久行權宜之制諸改姓者悉宜復舊甲子大丞相隋公
楊堅進爵為王以郡為隋國己巳以柱國沛公鄭譯為
上柱國辛未代王達滕王道並以謀執政被誅壬申以
大將軍長寧公楊勇為上柱國大司馬以小冢宰始平
公元孝矩為大司寇

大定元年春正月壬午改元景戌詔戎秩上開府以上

職事下大夫以上外官刺史以上各舉賢良二月甲子
帝遜位于隋居于別宮隋氏奉帝為介國公邑萬戶車
服禮樂一如周制上書不稱表答表不稱詔有其文事
竟不行隋開皇元年五月壬申帝崩時年九歲隋志也
謚曰靜皇帝葬恭陵

論曰自東西否隔二國爭強戎馬生郊干戈日用兵連
禍結力敵勢均疆場之事一彼一此武皇繼業未親萬
機慮遠謀深以蒙養正及英威電發朝政維新內難既

除外略方始乃苦心焦思克己勵精勞役為士卒之先
居處同匹夫之儉修富國之政務強兵之將乘讎人之
有釁順天道而推亡數年之間大勲斯集據祖宗之宿
憤拯東夏之阽危盛矣哉有成功者也若使翌日之瘳
無爽經營之志獲申黷武窮兵雖見譏於良史雄圖遠
略足方駕於前王而識嗣子之非才顧宗祊之至重滯
愛同於晉武則哲異於宋宣但欲威之復楚期於懲肅
義方之教豈若是乎卒使昏虐君臨姦回肆毒迹宣后

之行事身歿已為幸矣靜帝越自幼沖紹茲衰統內相挾
孫劉之詐戚藩無齊代之強隋氏因之遂遷龜鼎雖復
岷峨投袂翻成凌奪之威漳滏勤王無救宗周之殞嗚
呼以文皇之經啓鴻基武皇之克隆景業未踰二紀不
祀忽諸斯蓋先帝之餘殃非孺子之罪戾也

北史卷十

北史卷十考證

高祖武皇帝紀甲寅祀感帝於南郊○感字下周書有生字

五月庚午以南山衆瑞並集○南山周書作山南

五月甲午朔以旱故避正寢不受朝○據上文云三月乙丑朔則此當係甲子非甲午也

以應楊忠○楊監本誤陽今從上文詔柱國楊忠率騎一萬與突厥伐齊句改正

六月庚申彗星出三台入文昌犯上將經紫宮入苑○
苑周書作危

六月乙未以大將軍太原公王秉為柱國○秉一本作
東

以大將軍赫連達為柱國○大監本誤天今改從南本
廣寧公侯莫陳迴○侯莫陳迴周書作薛迴

集關河東諸軍校獵○關字下周書有中字

烏氏公尹升步騎五千守鼓鍾鎮○烏一本作焉

柱國宇文盛步兵一萬守汾水關○周書兵作騎又下文虹見於晉州城上首向南尾入紫宮紫字下有微字齊晉州刺史崔高嵩字上有景字

己卯軍次并州○卯當係未字之誤以上文十二月戊申計之則戊申距丁丑已為匝月安得復有己卯乎今各本俱同姑摘出之

延宗衆散衿甲軍門○衿一本作解應改從之

甲子帝入鄴城○以上文癸巳下文巳亥計之則子當

作午

偽齊破掠為奴婢者不問公私並放免之○破應從周
書作被

梁公侯莫陳芮為大司馬○芮監本訛內今改從南本
彫斲之物並賜貧人○斲監本訛斷今改從南本

以刑止刑以輕代重○以輕代重周書作世輕世重

詔自永熙三年七月以來十月以前○十月上周書有
去年二字應從之

宣皇帝紀是月遣使簡視京城○城周書作兆

大後承隋公楊堅為大前疑柱國榮陽公司馬消難為
大後承○丞監本誤承今俱改從南本

遣御正杜果使於陳○果周書作杲

乙卯詔江右諸州新附人給復二十年○右周書作左
戊午突厥遣使獻方物○午監本誤平今改從南本

辛卯行幸同州增候正前驅式道為三百六十重○式

周書作戒

其間誅戮黜免者不可勝言○間監本作問今從南本
靜皇帝紀癸丑封皇弟衍為鄴王○鄴監本訛萊周書
同今從列傳改正

史臣論內挾有劉之詐戚藩無齊代之強○內挾有劉
之詐周書作內相挾孫劉之詐應改從之

北史卷十考證

謹案第六頁後一行所在官司宜贖為庶人刊本
司訛私據周書改

第十五頁後四行庶自聽朝刊本自訛有據周書
改

第二十三頁後三行諸軍奮擊大破之遂平鄴刊
本脫鄴字據監本增


第二十四頁後七行戶三百三十萬二千五百八
十八刊本脫三百二字據周書增

第三十七頁後七行前驅戒道刊本戒訛式據周

書改

第四十六頁前一行內相挾孫劉之詐刊本孫訛
有又脫相字據周書增改





覆校官編修臣劉種之

校對官修撰臣張書勲

膳錄監生臣張孝基